

Date – 23/08/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Kolasib District chhunga Highway dan chah chu inremna siam anih hnuah vawiin chawhnu dar 2 khan tihtawp a ni.
2. Akashvani Aizawl leh Govt Mizoram Law College tangkawp chuan Govt Mizoram Law College Legal Chamber ah Independence Music Festival vawiin khan an buatsaih .
3. Vawiin khan a vawikhat nan National Space Day hman a ni.
4. Ukraine-a cham mek Prime Minister Narendra Modia chuan vawiin khan Ukraine President Volodymir Zelensky a kawm.

<><><>

KOLASIB ROAD BLOCK

Kolasib District chhunga Highway dan chah chu inremna siam anih hnuah vawiin chawhnu dar 2 khan tihtawp a ni.

Kawng tha an neih theihna tura Kolasib-a Lirthei neitu Pawl hrang hrangin an huaihawt tiamchin awm lo Road Block hi nimin atang khan huaihawt a ni a,

Vawiin chawhma dar 10:30 khan Kolasib DC Conference Hall-ah Kolasib District Bawrhsap Pu Robert C. Lalhmangaiha kaihhruaina in Kolasib-a sorkar official thenkhat leh Kolasib

Lirthei neitu inzawmkhawm pawl te chuan kawng dan chah chungchang hi an sawi ho a, hun engemawchen an sawiho hnuah inremna an ziam zui ta a ni.

An Inremna thuziak ah hian Kolasib District huamchhunga Mizoram chak lakna kawngpui, NH Division -III, PWD enkawl Bairabi - Zero Point, Bilkhawthlir - Kolasib leh Kawnpui - Khamrang te chu vawiin atanga thlakhat chhungin kawngpui khuar lai hnawha pangngai taka kal theihna turin an siamfel hman nise,

Kolasib District huam chhunga Mizoram chak lakna kawngpui NHIDCL enkawl Sethawn RTP Workshop kawng chhe lai leh Kawnpui quarry kawng chhe lai te hi an lo intiam tawh angin vawiin atanga ni 15 chhungin lirthei eng chi pawhin nuam taka zawh theih turin an siamfel hman tur a ni, an ti.



CM

National Institutional Ranking Framework ten India rama College tha an thlanah Pachhunga University College chu 35-na a ni a, Pachhunga University College hi kum thum chung a zawnin top 50 a an lanna a ni.

Pachhunga University College chuan vawiin khan PUC Seminar Hall-ah a lawmna hun an buatsaih a, Chief Minister Pu Lalduhoma leh Higher & Technical Education Minister Dr. Vanlalhlana ten an hmanpui a ni.

Chief Minister chuan, India rama college tha thlan chhuah zinga tel hial khawpa PUC in hma a sawn chu a lawm takzet tih a sawi a, Zirna tha zawk Mizorama a awm theih nana a kaihhruai sawrkarin ruahmanna tlangpui a tarlang a; hriselna leh zirna lama sum sen chu sawrkar chuan expenditure ah a ngai lova investment a ni, a ti.

PUC hian Chief Minister hi an college a lo zir tawh a nihna hrerengin thilpek an lo hlan a. Pu Lalduhoma hian 1976 khan PA to CM a nih laiin PUC ah hian Bachelor of Art tha takin a lo pass tawh a ni.

PUC ah hian Arts, Science, Commerce leh Management stream zirna te awmin Under Graduate, Post Graduate leh Ph.D zirlai 2700 chuang an awm mek a ni.

<><><>

INDEPENDENCE MUSIC FESTIVAL

Akashvani Aizawl leh Govt Mizoram Law College tangkawp chuan Govt Mizoram Law College Legal Chamber ah Independence Music Festival vawiin khan an buatsaih a,

He hun hi Assembly Speaker Pu Lalbiakzama'n hmanpuiin, hmun dang atanga Mizoram chhunga hmasawna thleng tur chu do lova hnam ziarang leh nunphung humhalh chung siin Mizoram tana remchanga hman thiam a pawimawh a tih thu a sawi a, chim ral hlauh vanga ramchhunga hmasawna lo thleng tur lo do chu thalo atih thu sawiin hnam ziarang leh nunphung humhalh chungin hmasawna chu nunpui thiam a pawimawh a ti a, ram changkanna lo lut te chu thlir dan thiam a pawimawh a ti a ni.

Pu Lalbiakzama chuan Rimawi chu mihring in lawmna a neih lanchhuahtirna langsar ber zing a mi a ni a ti a, Rimawi chu thusawi, infuih tharna leh inpumkhatna hmanrua chak ber a ni tih sawiin Rimawi chuan ramri, nunphung leh kum thliar hrang lo in mitin thinlungah thu a sawi nghal vek thei a ni a ti a, hnam hrang leh ram hrang a cheng te pawh min kuah khawm thei tih sawiin rimawi chuan mi beidawngte a kai tho a, huaisenna leh beiseina thar a pe thin a ti bawk.

Pu Lalbiakzama chuan zai mite chu Mizo nihna ti lang thei hla chawisang zual tur leh Mizo nihna vawng nung reng turin a chah a, zirlaite chu dikna tundin kawnga Mizoram hmalam hun an kutah a awm tih sawiin Dan leh hrai lama kawng zawh thlangtu te chu an hna sumdawna ah ngai lova, rawngbawlna ah ngai zawk turin a chah bawk.

Independence Music Festival-ah hian Akashvani Aizawl Director, Cluster Head ni bawk Pu DR Lalropuia chuan ramchhung State capital zawng zawng a AIR Stations-te, tun August thla chhung a Independence Music Festival nei tur a tih an nih angin, he festival hi buatsaih a ni a ti. (BYTE)

Vawiina hun hi Govt. Mizoram Law College Principal Dr. Esther L. Chhange chuan a hmanpui bawk aa, Radio program ngaithla thintute hnenah Radio set pekchhuah a ni a, heng bakah hian Ram zalenna pualin quiz competition neih niin Law College zirlai hrang hrang te an tel a, chawhnu lamah Independence Music Festival pualin concert buatsaih niin zaithiam hrang hrang an zai a ni.



MONKEY POX

Khawvel ram hrang hrangah Monkey Pox vei hmuh chhuah an awm nual avang leh he hriin Mizoram a lo luh ve palh hlauhthawn thila lo inralrin lawk nan vawiin khan Core Committee on M.Pox din a ni.

Directorate of Health Services Director's Meeting Room-ah Health Directorate Official te thu khawm chuan Core Committee hi dinin hemi hnuaiah hian committee peng hrang hrang din chhawn leh a ni ang.

He meeting hi Dr. Vanlalsawma, Principal Director in a kaihruai a. IDSP State Nodal Officer Dr. Vanlalrengpuia chuan India ramah hian case hmuh la ni chiah lo mah se tunlai khawvelah inkalpawhna a awlsam tawh avangin he hri hian a luh chilh thuai lovang tih a sawi theih loh a ti a ni.

Meeting chuan ZMC chu ICMR lamin Sentinel Site atan a lo puan tawh avangin thum chaka tihchangtlun chhoh zel a ni tih tarlangin hri pui leng a awm palh pawha lo in rinlawk dan tur kawng hi ruahmanna a lo kalpui tawh tih an tarlang a, ZMC bakah hian Lunglei Civil Hospital pawh tlema tih changtlun chuan Sentinel Site atan hman mai theih a nih beisei a ni, an ti.

Vawiin vek khan Health Department chuan thu chhuah siamin tunhnaia social media hrang hranga Siaha naupang M.Pox hri vei hmuh chhuah ni awma thu thang chu thu dik lo a nih thu leh naupangin a vei natna hi Tangseh a nih zawk thu a tarlang a.

Naupang pawh hi tunah chuan a dam tawh a ni an ti.

Social media-a thuthang dik lo awm thin chu pawh an tih thu leh hemi kawngah hian thil Chiang lo, mipui thin ti thawnga tithlabar thei thil theh darh lo turin mipuite an ngen nghal bawk.

Monkey Pox hi mizo tawnga a hming dah a ni lo a, Zawng hri ti a mizote hriat lar thin ‘Small Pox’ nen a in ang lo va, ngaih pawlh loh tur a ni tih Health Dept thuchhuah chuan a tarlang bawk.



MYANMAR GOODS

Myanmar atanga lakluh thin bungraw chi hrang hrang a rawn kal mumal theih loh avangin Zokhawthar leh a kianga Mizo khua, Khawmawia Puakphurtu leh dawrkai bakah lirthei hmanga eizawngtuten harsatna an tawk mek a.

Zokhawthar VCP Pu Lalmuanpuia hnen atanga thu dawn danin June ni 8a Teddim leh Zokhawthar inkara Run lei Bomb chhiat a nih hnuah Tahan atanga Zokhawthar inkarah sumdawnna bungrua leh nitin mamawh thlai leh thildangte sumdawnna kawngpui hman lar berah an kal mumal theih loh avangin Tahan atangin Chin Hills a Falam kaltlanga bungrua hi Mizoram lam pana rawn phurh thin a ni a, mahse, he kawngpuiah hian ni 3 lai te kawng laka thang a ngaih avangin bungraw lo thleng ang ang te chu tun hma zawng aiin a man a sang chho vek tawh a, Tun hma lama Ni khata bungraw thleng thin kha, tunah chuan kar khat velah a thleng thin a ni. Hei hian Bungraw thenkhat panhnah leh tawih mai thei thil a chhiat phah fova, sumdawnngteah harsatna a thlen fo thin a ni.

Bungraw phur chi hi Falam lam atanga kal hi PDF in motor lian kal a phalloh hnu phei chuan, Bungrua hi motor te in an thiar a, bungrua a thleng muang hle a, Hei hian Nitina bungraw load/Unload a hnathawk Zokhawthar leh Khawmawi mipuite tan eizawwna lamah harsatna a thlen nasa em em a ni.

Zokhawthar Transport Union Secretary hnen atanga thudawn danin Customs ten thlahlui July ni 25 atang khan Mizorama bungraw phurh luh an phallo bawk a, Nitina Zokhawthar atanga bungrua chhuak hi LPK trip hnih ang vel chauh a ni tawh a, hetihlai hian Zokhawthara Mutia mi 400 vel chuan hnathawh tur an hmu mumal ta lo a ni.

Tun dinhmunah chuan Myanmar atanga Bungrua lo thleng a awm mumal loh avangin khualzin an tlem a, Taxi, thingpui dawr leh thil danga eizawngtu pawh nasa takin a nghawng chho mek a,

hetihlai hian Myanmar leh India pawisa inthlengna rate chu India pawisa Rs.1 in Myanmar Kyat 67 a thleng theih mek a ni.



NATIONAL SPACE DAY

Vawiin khan a vawikhat nan National Space Day hman a ni a. He hun hmanpuitu President Draupadi Murmu-i chuan New Delhi-a lawmna inkhawmah Indian Space Research Organistion (ISRO) in vanthengreng zirchianna lamah an thawh hlawk zia sawiin ram hmasawna atan pawh an thawk tha hle a ni a ti.

President chuan space lama hmasawna chuan hriselna, veivahna, environment, energy, security, IT leh thildangah te an thawhhlawk hle a. Vanthengreng zirchianna hian mihring theihna a tipung tih sawiin ngaihtuahnaa thil awmte a takin a chantir a, van sang thil inthupte kan hriat phah a ni a ti.

ISRO chairman S Somanath chuan national Space Day chu rampumah hman niin department, ministry, zirna in, science organisation, NGO leh mipuiten an hman a sawi a ni.



PM

Ukraine-a cham mek Prime Minister Narendra Modia chuan vawiin khan Ukraine President Volodymir Zelensky a kawm. Tun tuma PM Modia'n Ukraine a tlawh hi India PM zinga tlawh hmasa ber a ni a. Kum 1992-a India leh Ukraine ten palai an intirh tawn hnuah India Prime Minister zin hmasa ber a ni. Prime Minister Modia leh President Zelensky te hian ram pahnih inkar thil pawimawh tak tak eibar zawna leh sumdawnnate, agriculture, hmasawna ruhrel infrastructure, health leh zirna, damdawisianna, ralthuam, culture leh mipuite inpawhtlanna tur thilte an sawi dun dawn a. Hei bakah hian Ukraine buaina tawh mek chungchang an sawidun dawn bawk a ni.



PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hman a sawi leh

dawn a. Mizo tawnga lehlinin a zui ang. Tun tum ami hi episode 113-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestre am a ni ang.

